

## 《山水吟草十首》

### 〈遊合歡山清境五首〉

癸巳年中，與文會佳友，驅車遊臺中、合歡山、清境農場，三日而返，恣覽天地美景，相與吟作賦詩，記此五首，聊暢敘幽情。

之一：

#### 〈登合歡山小憩博望新村〉

勞車千里憩山鄉，餐罷梯田散步涼；嬉笑坡間緣菜圃，茶叢且伴嶺花香。

之二：

#### 〈登武嶺〉

際會合歡武岳巔，振衣俯對數峰千；無煩嶺上傷韓愈，閒寫高情世外箋。

之三：

#### 〈山莊前廣場夜歌〉

偶在峰環小場中，長歌數曲競鳴蟲；河星曲罷疑明滅，樽酒清音散入風。

之四：

#### 〈清境草原上作〉

白雲散漫沐晴光，環碧坡頭綴綺香；好是隨風馳遠近，青青草上逐綿羊。

之五：

#### 〈車行臺中市遇虹〉

小雨初晴見彩虹，霓橋恰在路中央；飛車擬作遊仙客，一段幽情在市行。

### 〈南投之旅偶得二首〉

壬辰年末，得二日清閒，舉家驅車南投，覽遊日月潭、埔里勝景，山光潭影堪流連，因賦二詩為念。

之一：

#### 〈日月潭畔晨起有感〉

鳴禽小徑探幽奇，獨步尋詩日漸熙。青草叢中零點點，浮煙幕裡語遲遲；櫻華氣暖顏開處，梅骨風飄淚落時。悲喜不期傷物化，林間長立自吟思。

之二：

〈遊中台禪寺偶得〉

林苑鐘迴醒世祥，虹橋閒跨醉荷香；人間合此隨緣化，半是清明半是茫。

〈高雄西臨港線自行車道上作〉

港市青山倚浪花，飛輪漫跨逸思遐；與風競速單車道，掬采流光逐日斜。

〈記鹽分地帶小旅行二首〉

乙未年春，與父親二人驅車西南沿海，遊北門、七股，盡覽鹽地風光。求學於外多年，每感客舍似家家似寄，難得相伴，遂吟作二首，記此悠遊時光。

之一：

〈遊北門〉新建遊客中心，聞說婚紗美地，水晶教堂、彩繪壁畫、錢來也老舖等處處宜拍照，為戀侶必訪；有道是女兒為父親前世情人，相伴同遊，亦作一對耳。

春遊驅駕到北門，漫步鹽埕海口村。修舊店中凝歲月，復新館內展鯨鱗；水晶屋畔流波動，圖畫牆前意態真。攝像機前頻弄影，笑看前世老情人。

之二：

〈遊七股鹽田〉七股鹽博物館中，啖鹹冰棒，聞父親憶幼時至鹽田偕祖父勞作之事。旁之水田設施詳備如昔，父親殷勤紹介，為範工具用法。水車之上，望遠近轟大小鹽山，一片水陌無垠；臆想當年苦辛一二，並念祖父生前舊事。

鹽砂七股立白錐，落照凌波放眼奇。涉足白峰聽古事，執耙曬場效英姿；冰枝口裡鹹甜味，父祖心中少壯時。龍骨車前肩並影，又將何日念懷辭。